

# Utusan Malaysia- 30 May 2011

## Parlimen Belia wadah suarakan pendapat, pandangan

BUAT pertama kalinya dalam sejarah, negara ini akan ada Parlimen Belia. Ini bermakna suara golongan berkenaan dapat didengar terus oleh kerajaan.

Dan ini juga bermakna, pandangan-pandangan golongan yang terkenal dengan ketinggian semangat serta mempunyai pelbagai idea ini akan didengar, dibincangkan dan seterusnya dipertimbangkan kerajaan.

Penubuhan Parlimen belia ini sekali gus dikatakan mengisi 'tiga permintaan asas belia', selama ini - iaitu golongan itu mahu suara mereka didengar, peranan mereka diiktiraf, dan isu-isu belia ditangani dengan cara yang berorientasikan mereka.

Walaupun tidak dapat dilaksanakan dengan segera, tetapi sudah pasti inisiatif yang diumumkan oleh Perdana Menteri, Datuk Seri Najib Tun Razak dalam Himpunan Sejuta Belia sempena Sambutan Hari Belia 2011 di Putrajaya itu memberi lembaran baru kepada golongan ini.

Pendekatan ini, memberi peluang kepada mereka memilih wakil mereka untuk membahaskan usul serta mencadangkan kepada kerajaan.

Ini kerana ketika ini, mereka tidak mempunyai saluran khas untuk mengemukakan cadangan dan pandangan mengenai sesuatu isu kepada kerajaan.

Mereka meluahkan semuanya, sama ada komen-komen yang baik atau tidak, dalam media baru seperti blog, portal berita dan laman sosial seperti Facebook, Twitter, Myspace dan lain-lain.

Bukan itu saja, kecenderungan mereka untuk mendapat maklumat yang tepat mengenai dasar-dasar kerajaan juga adalah rendah kerana adanya pihak tidak bertanggungjawab yang mengambil kesempatan memutar belit apa sahaja langkah dan tindakan yang dilaksanakan oleh kerajaan dalam sesuatu isu.

Justeru, Parlimen Belia bukan sekadar dilihat dapat melatih dan melahirkan barisan pelapis kepimpinan muda, banyak perkara-perkara berbangkit lain dapat ditangani dengan penubuhan parlimen ini.

Suara-suara mereka akan didengar di tempat yang mulia iaitu Parlimen, bukan di tepi-tepi jalan dengan menyertai demonstrasi atau rusuhan.

Oleh itu, untuk merealisasikan penubuhan Parlimen Belia ini, konsep, komposisi keahliannya, umur dan cara pemilihannya perlu dilakukan secara telus dan menarik penglibatan menyeluruh daripada belia.

Ini untuk menjamin, semua kelompok belia di negara ini mempunyai wakil dalam Parlimen itu kelak.